

53
117

I

QUÆSTIO MEDICA.
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM,

Die Jovis II. Februarii.

M. CLAUDIO BERGER,
DOCTORE MEDICO,
ET ACADEMIÆ CENSORE, PRÆSIDE.

An felicioꝝ & tutioꝝ in Balneo Purgantium usus ?

I.

MEDICUS artem suam, salutis humanæ præsidem, divinitus acceptam, divinitus exercet; sanitatem quippe præsentem tuetur, fugientem revocat, amissam restituit, suæque dogmata & consilia universa ad hunc scopum dirigit; accuratè etiam perpendet momenta, quibus munus suum ritè possit implere: verum solus usus facit Artificem; & sicut Agricola aut Gubernator, sic Medicus non disputatione, sed usu fieri perhibetur: exploratum habet, & experitur sanitatem servari recto vitæ instituto, curatione methodicâ reddi, veris & genuinis indicationibus fultâ, quarum ope destitutus, & perversâ plerumque ratiocinatione delusus, ἀτυχὴς & ἀέτιος, cæcorum more curat, & turpiter labitur. Primas tenet Natura in curationis opere, quæ quicquid habet virtutis & auctoritatis, secundum ipsam ipsam rerum veritatem, constanti rectaque ratione sustinet: hæc ut pacis amica, motos furentium humorum fluctus novit compescere, eosdemque aut emendare aut prorsus abolere. Suam Medicus industriam omnem ad ejus imitationem componit, eamque attentè intuens, motuum ejus fit jugis & assiduus observator, ipsique pro renatâ suam opem subsidiariam conferendo, laborem ejus accelerat, accelerando promovel, promovendo perficit; & si quid incidat in corpus hostiliter sæviens, & in eo quidquam retineatur immoderatum, quodque in pristinam bonitatem reduci nequeat, cujus occurfu & molestiâ, in obeundis vitæ muniis Natura interturbetur; Medicus ut fidus ejus Minister, statim præsto est, ut com-

2

muni operâ & studio, mutuisque conatibus ad *Ægri salutem* conspirantibus, *cacochymia* calamitatum harumce turbarumque ferax expungatur tempestivâ purgatione, quæ veluti *Medicinæ* manus altera, tutior multò & felicior procedet, quo mitius exercetur & humores excernendi fluidiores fiunt atque dilutiores. His machinis male affecti aut è morbo nondum penitus recreati, auxilium præsentissimum experiuntur,

I I.

O P E S naturæ potissimum elucet in productione medicamentorum purgantium, quæ pro maximâ sui parte è plantis prodeunt. Hæc è parente omnium tellure exoriuntur & surgunt, magnâ equidem ubertate & varietate distincta. Tot naturæ dona & morborum flagella expellendæ *Cacochymia* accommodantur: horum nullum est compositum ex pluribus præferendum simpliciori, ut magis naturali, cujus scilicet principia rectius & sapientius permiscentur. Veritati consentaneum est, in iis, ut & in aliis stirpibus succum nutritium circulari, cujus circulationis ope, puritatem, raritatem & perfectionem adipiscitur. Purgantia quæcunque sunt, calorem obtinent, quem partibus internis quas subeunt, furtim inurunt; hujus tamen caloris defectu manca esset vis illorum purgatrix: vis autem illa non temperiei resultanti ex quatuor primarum qualitatum unione & contemperatione, sed materiæ jure ascribitur, quæ ipsi naturaliter, Dei concessu, infixæ est & insita, haud secus ac in cibis, substantiæ partibus nutriendis aptæ & familiares, sunt innatæ; hæc propria unicuique subjecto materia nihil esse videtur in plantis & animalibus, quam spiritus ille insitus calore & humore primigenio perfusus, quem thesaurum verè æstibilem, quandiu plantæ & animantes possident, tandiu vires suas & facultates custodiunt: hujus spirituosæ, tenuis subtilisque substantiæ beneficio, cathartica mole licet minima, totum corpus subeunt & in ipsum diffunduntur, sicut res odoratæ, mole quidem exigua, magnum aeris spatium implent. Illa duplicis sunt generis; improprie dicta, quæ obvium quemque humorem secum auferunt, exturbant & præcipitant; proprie verò, quæ humorem vitiatum cum delectu trahunt, adinstar magnetis ferrum cominus ad se allicientis: sic cholagoga bilem, phlegmagoga pituitam eliciunt, magno ægotantium solatio & commodo, dum notus humor, singularis morbi author, convenienti cathartico repurgatur, quem ut sibi affinem & congenerem prolecat, & à cæteris succis sejungit. Neque verò purgans quodcumque existimes privari illâ qualitate mordaci, quâ velliatur Natura ad excludendum quidquid sibi infestum est; habet enim hanc perpetuò sibi comitem & adjunctam, cujus acrimoniâ, ut & humoris vacuandi morsu, Natura, gemino quasi stimulo laceßita, utrumque, catharticum scilicet & humorem allectum excutit, forasque eliminat.

I I I.

P U R G A T I O vulgò audit pravi humoris per loca naturæ normâ & lege commoda evacuatio. Hæc sæpè *ἀντιόμας*, ductuque suo & conatu vires suas colligens, & factò velut agmine, quicquid vitiosè se habet aut superfluit, id omne è corpore expurgare novit, absque ulla ope Medici & medicamenti; quos enim sponte Natura persanat frustra Medicina fatigat. Verùm sapissimè supervacaneorum, humorum crebrò vitiosorum iliade obsessâ, sub quibus tanquam sub pondere gemit, & anxie premitur, indiget artificiosâ purgatione, hæc op-

portunè à Medico juvante præscribitur ; hujus interventu Natura in suo opere peragendo aut impedita, aut segniùs versata, excitatur, juvatur, & ad everrendas has sordes penitusque excludendas impellitur. Ad hunc optatum finem pervenitur, modo Catharticis, modo Emeticis ; sed his minis turò, minùsque accommodatè naturæ motibus, cùm vomitu ventriculus convellatur, & præterea conditiones omnes ad ejus usum requisitæ rarò & difficulter occurrant. Purgatio summâ cautione institui debet, hæc multæ est & difficilis opera : purgans enim medicamentum vi æstuosâ & deleteriâ potens, quo valentius est, eò graviùs agitat & mordet : hinc plurimorum deploranda calamitas, qui malè consulti valentiora pharmaca indiscriminatim usurpant, mitiora deserunt, cùm hæc plerumque multoties repetita, majori securitate minorique perturbatione vim effrenatorum compensent, & frequentissimè superent, absque ullo metu malæ intemperiei inurendæ visceribus, nisi morbus præceps aut mali moris aliquando ea exigat, & cunctationem omnem respiciat : neque leviter Natura juvatur, commodiùsque humor vitiosus commovetur & ejicitur, dum benefico madore contemperatur, quâ temperatione placidè fertur ad exitum, & liberiore cursu proruit.

I V.

VETERIBUS Balneum aquæ dulcis fuit admodum familiare & penè quotidianum, quod ad voluptatem tantum & vitæ delicias paulo studiosius institutum fuerat, eoque in pretio habitum, ut aliquando septies in die se lavasse Patricii Romani gloriarentur. Ex his vitiorum delinimentis, hæc lavatio mutata est & abiit in salubriores usus, qui ad sanitatis tutelam & morborum depulsionem mirificè valerent ; egregias etenim in se dotes continet, quas sui indigentibus liberaliter procurat, modo juxta leges Naturæ, juxtaque regulas sanitatis, morbique mores, sano quoque Medentis consilio adhibeatur in usum. Gravier autem peccat in rem ægotantium, qui Balneum præscribit iis, in quibus inest principis cujusdam visceris imbecillitas, sive sit naturalis, sive à morbo præcedente profecta, sive inclinans & impendens nondumque etiam genita ; periculum enim est, ne in partem jam infirmam & effictam, aut proximè ad statum male validum vergentem, vitiosus humor fortè decumbens, novas affectiones accersat ; seriò quoque perpendendum, num aliqua subsit in primis venis cruditas, juncta cutis densitati, horrorem quippè excitaret, & horror febrem aut pareret, aut tenderet : num quoque adsit hypochondriorum durus renitenisque tumor sensibilis, qui aut inflammationem, aut scirrhum argueret : hisce & plerisque aliis pro re natâ neglectis cautionibus, læsio non levis inferretur lavantibus. His impedimentis subtractis, vis longè maxima balnei, tum in morbis præcavendis, tum curandis persentitur : vi suâ blandâ ideo confert, quia corporis habitum humectat, tepore suo cutis spiracula referat, quibus referatis patentior sternitur via fuliginosorum excrementorum expirationi, & hærens intus & in cute colluvies impura foras exturbatur ; Spiritibus igneis & catulientibus impingit compedes, nec exiguum præbet solatium colico dolore vexatis, nephriticis, scabie, & acerbâ libidine fœdatis. Balneo demum corpus ad purgationem paratum fit & *evesor*, & tanquam fotu salutari humor vacuandus, mitior & dilutior redditus, tutiùs ejicitur. Infinitæ demum aliæ commoditates ex hujus usu manant, quas intra breve temporis momentum eo demersus percipit, & se beari gaudet.

NOVUM non est asserere purgans medicamentum quodlibet, semel sumptum, ventriculo, intestinis, vicinisque aliis quas attingit partibus, laborem parere, easque aliquando concutere graviter, torsionibusque molestis fatigare: sed novum est dubitare, minori negotio & multò tutius fructuosiusque, purgans illud in Balneo partes suas agere, & suavis auxiliari. Cacochymia quippe educenda, largior cumulata in corporis penetralibus, morâ diuturniori facta crassior, firmiter impingitur; Eâ saburrâ & partes aluinæ regionis turgent, & corpus universum degravatur, eademque fit plurimarum obstructionum, ac proinde infinitarum penè ægritudinum procreatrix individua: calor quoque peregrinus partibus hisce interioribus inultus, ex sordium istarum putredinis vitio infectarum contagio, perniciem clanculum infert vix eluendam. Balnei gratiâ & privilegio impuri illius humoris expurgatio feliciter succedit, contumax licet & indocilis dominium pati, redditur sequacior; crassior quoque viscidus & tenaciter adhærescens, emollitur diluiturque; viæ publicæ laxantur & patent; intemperies calida, cui sociam se præbet siccitas, edomatur, ut & ea quam creat medicamenti purgantis vis æstuans; obtunditur feritas & morsus humoris exultantis: demum, lentus nimium molestæ purgationis exitus maturatur blandis aquæ perfusionibus, cujus vis etiam altiores corporis recessus, nec non & angustiora loca subit, in quibus tanquam in carcere humor ille jamdiu detentus residebat: expeditior paratior & ad fluxum factus aptior, prorsus eximitur, facillè cedens & quasi ad nutum obsequens medicamento purganti. Sic oblitterato, nulloque hujus cacochymię ut & cathartici superflite vestigio, serenitas advenit, sua redit corpori facies, ipsiusque decor genuinus renovatus, luculentum præbet completæ & innocuæ purgationis argumentum.

Ergo felicior & tutior in Balneo Purgantium usus.

Domini Doctores disputaturi.

M. Philippus Bernardus de Bor-	M. Petrus le Tonnellier.	M. Guydo-Erasmus Emmerez.
degaraye.		
M. Jacobus Simon Gilles de la	M. Jacobus Minot, Serenissimi	M. Michaël de Hodencz.
Riviere.	Ducis Borbonii Medicus ordi-	
	narius.	
M. Ludovicus Lemery, à Regiâ	M. Joannes Gaillard.	M. Poncius Maurin.
Scientiarum Academiâ.		

Proponebat Parisiis CLAUDIUS BERGER Parisinus, Bacca-
laureus Medicus, è Regiâ Scientiarum Academiâ. A. R. S. H. 1700.

Apud FRANCISCUM MUGUET, Regis & Facultatis Medicinæ
Typographum.